



Aqqalu C.Jerimiassen
Atassut

UKA 2024/12
24. september 2024

Unnuinermut akitsuut pillugu Inatsisartut inatsisissaattut siunnersuut

(Aningaasaqarnermut Akileraartarnermullu Naalackersuisoq)

Ukiut tallimat uuma eqqunneqarnissaa sorsuutingarput Atassummiit, UKIUT TALLIMAT!

Inatsisartut ukiakkut ataatsimiinnerat 2019 ulloq 13.november imm.86 inatsisartunit tamanit taparserneqarpoq, taamaattorli taamanili suliaq marrissimavoq.

Qujanaqaarli kiisami marreqqaannarneq kaanngartinneqarsimammat.

Aajunali eqqumiiginartortaa, sooq aningaasanut inatsisissami isumaqatigiinniarnermi sorsuutigineqaaqqaartariaqarsimassanera siunnersuut akuereriigaq ukiuni sisamani pinerit tamaasa?

Inatsisartuusugut ima tassa pissaaneerussimatiginerpugut, allaat siunnersuutigut akuerineqareernikuusut naalackersuinikkut piumagaanni naalackersuisup susassaqartuusup suliamut suliaqkiissut qarsupiinnarsinnaallugu?

Taamaattoqarsimassappammi Naalackersuisut Inatsisartunit sulisitsisoriniakkaminnit oqartussaassuseqarnerulersimassapput, uagullu inatsisartuusugut toortakkanik pingasunik arlaannik toorsiertortartuinnartut atuuffeqalersimassuugut.

Kiisamiuna akitsuutit pinngortinneqartalersut nunatta avataanniit akilerneqartussat, kiisamiuna nunatsinni kaagi ataaseq aggorunnaarlugu avataanniit pilersinnissaa Atassutip eqqartortuartagaa qaatuaqissutaalersoq.

Takornariammi ooritoriartorlutik aningaasaatimmik miillooriartorlutik tikittarput, nunarpullu avataanniit tikissallugu akisuukasiumat naatsorsuutigereertarparput peqarluarnerpaapajaaginnaat kisimik tikittartut, Ibiza-kkunnnullu tikittartuniit allaaneroqisut assersuunneqarsinnaanngitsullu.

Uagullumi nunarsuup ilarujussuani kiserngorukkunnarsilerpugut takornarianut sumilluunniit akitsuuteqartitsinngitsuusugut, tamannalu allanngortinneqartussanngormat qujanarpoq.

Atassummiit tamatumunnga tapullugu kaammattuutigiumavarput, ataavartumik akitsuutip annertussusaa aningaasap naleerukkiartorneranut aningaasarsiornerullu kaaviaarneranut naleqqussarneqartuartassasoq.

Takornariaqarneq iluanaartueqarfiginerusariaqarparput, takornariaqarneq inuiaqatigiit pissarsiaqaatiginerusariaqarpaat. Nunammi sanilitta ilaat maanna umiarsuarput takornariartaatinuinnaq allaat assigiinngitsunik tallimanik ilaatigooriartorlutik akitsuuteqartitsisinnaasarput, talinnermilu motoritik qamittussaataitaallugit taliffigisaminnut kallerup inneranut atassusertussaataitaallutik.



Uagut tamakkua ilikkagaqarfiginerusariaqarpagut atorluarnerusinnaaneri, inuiaqatittaa kaasarfiit kisiisa isigiunnaamilaarlugit, tassungami pikkorippallaalersoortoortuartarnerput qiningaasugut nassuerutigiinnartariaqarparput, nassuerneq annernanngimmat kusassarniakulunnerinnarmiit.

Unnuisarfiit, takornariaqartsitsiviit takornarianullu tammajuitsussarsiniartarfiit takornarianut tammajuitsussanik tunisisarneri nunat allattaaq assingalugit allatut akeqartitsisarnissaat akitsuusersueriaatsikkut eqqarsaasersuutigisinnaaqaarput.

Tassuunakkut aningaasaq suli inuiaqatigiinnut tutsinneqartussaq inuiaqatigiinnit aaneqartuunngitsaq pilersissiinnaassatsigutaaq.

Atassummiit taamatut naatsukullamik oqaaseqaateqarluta, siunnersuut tapersingaarlutigu Inuussutissarsionermut Aatsitassanullu ataatsimiitsitaliamut innersuupparput.